

Siunissaq qaninneq eqqarsaatigalugu qaleralaqarfik Sermiligaap piorsaaviginissaa pillugu oqallisissiatut siunnersuut.

(Gerth Mikaelson, Naleraq)

Akissuteqaat

(Aalisarnermut, Piniarnermut, Nunalerinermut Imminullu Pilersornermut Naalakkersuisoq)

Apeqquteqaat aallaavigalugu oqallinnissamik soqutiginartumut siunnersuuteqartoq Gerth Mikaelson, Naleraq, Naalakkersuisut sinnerlugit qutsavigaara.

Sermiligaami Tunumilu aalisarnerup ineriartortinneqarnissaa Naalakkersuisunit annertuumik ukkatarineqarpoq. Tunumi aalisarnerup ukiorpassuarni tamakkiisumik ineriartortinneqarsimanngilaq, tamatumalu malitsigisaanik Tunumi innuttaasut Kalaallit Nunanni nunap immikkoortuini allanisuulli aalisarnerup periarfissiissutaanik ineriartortinneqarsinnaanerani illu iluaquserneqarsinnaasimanngillat. Naalakkersuisut taamaammat Tunumi aalisarnerup ineriartortinneqarnissaanut pilersaarut, 2024-miit 2030-mut atuuttussaq suliarisimavaat. Pilersaarut najukkani aalisartut qanimut peqatigalugit suliarineqarsimavoq. Pilersaarusiortnermi piffissaq ungasinnerusoq eqqarsaatigalugu aalisartut amerlanerulersinniarlugit, tunisat annertunerulersinniarlugit aalisarnermi illu isertitarineqartartut amerlanerulersinniarlugit aaqqiissutissarsinissaq anguniagaavoq.

Ineriartortitsinissamik pilersaarut maanna ukiut marluk ingerlanneqalereerpoq, piffissamilu pineqartumi aalisarnerup malunnaatilik siuariarsimavoq, pingaartumik 2025-mi. Ineriartortitsinissamik malinnaasinnaaniarluni naleqqussaasarniarlunilu Tunumi aalisarnerup ineriartortitsinissaanut aqutsisoqatigiit pilersinneqarsimapput, taakku ukiumut ataasiarlutik-marloriarlutik ataatsimeeqatigiittarput, ukiumilu aalisarsimaneq siunissamilu periarfissat pillugit nalilersuisarlutik. Tassani aalisartut Sermiligaameersut peqataasarpot, aqutsisoqatigiinniillu Tunumi aalisarnermi suliallit akornanni oqaloqatigiittarnissaq aamma Tunumi pissutsinut naapertuuttunik aaqqiissutissarsiortarnissaq qulakkeerneqartarpoq.

2022-miit ineriartortitsinissamik pilersaaruteqarnerup aallartinneqarneraniit 2025-mi Tunumi pisarineqartartut 80 %-it sinnerlugit amerleriarsimapput. Pingaartumik saarullit pisarineqarnerusallimapput, qalerallilli aamma annikinnerusumik pisarineqarnerulersimallutik. Taamaalilluni pisarineqartartut 2030-mi 30 %-imik qaffassimanissaannik anguniagaq anguneqareerpoq, Aqutsisoqatigiillu 2026-mi anguniagaassanik nutaanik annertunerusumik anguniagaqarfiusunik aalajangersaasoqassanersoq misissuiffigissavaat.

Ineriartortitsinissamik pilersaarutip suliarineqarnerani Sermiligaami aalisartut tunitsiveqartoqarnissaanik kissaateqarsimapput. Taamaalilluni ineriartortitsinissamik pilersaarummi anguniakkat ilagaat, Tunumi tunitsiveqarnikkut periarfissat aamma pitsanngorsaaffigineqarnissaat. Tunitsivimmik pilersitsinissaq ingerlatsinissarluni Naalakkersuisut isumagissallugu suliarisanngilaat. Akerlianik suliffeqarfiit, pisortat ingerlatsivii namminersortulluunniit Kalaallit Nunaanni sumiiffinni tunitsivinnik ingerlatsisuusussaapput. Naalakkersuisulli aalisarnermi atugassarititaasunik pitsanngorsaasussaapput, Tunumilu tunitsivinnik pilersitsinissaq ingerlatsinissarluni

pilerinarnersillugit. Tunitsivimmik pilersitsineq imminut akilersinnaalersitsinnagu aalisarnermik ingerlatsisoqartariaqarpoq. Tassa ineriartortitsinissamik pilersaaruteqarnermi aamma ukkatarineqarpoq, inuit amerlanerit eqqortunik atortoqarlutik aamma aallartinnissamut eqqortumik ilisimasaqarlutik aalisartunngornissaasa qulakkeerneqarnissaat.

Tamatuma anguneqarnissaanut sakkussat ilagivaat, aningaasanut inatsimmi konto 50.01.20, Tunumi ineriartortitsilluni paasissutissiillunilu pilersaarutitut tapersiisussa. 2025-mi tassunga atugassatut 2 millioner koruunit aningaasaliissutigineqarlutillu atugassanngortinneqarput. Aningaasat taakku ilaatigut aalisarnermi atortunut pikkorissarnermullu atugassiissutigineqarsimallutik.

2025-mi ajunngitsumik ineriartortoqaraluartoq Tunumi aalisarnek sikumit silamillu aporfeqartarsimavoq. Aalisartut namminneerlutik silap unerisimanninnerulersimanera nalunaarutigisarpaat, tamatumalu malitsigisaanik ukiukkut aalisarnek sikoqarneranit sunnerneqartartoq. Ineriartortitsinissamik pilersaarummi anguniakkat ilagivaat, sikut qanoq innerannik aalisartunut ilisimatitsissuteqartarnissaq, aasaanerani sikut qanoq siaruaassimatiginersut aamma ukiuunerani sikut qanoq issutiginersut pillugit paasissutissiinerusarniarluni. Paasissutissat taakku ukioq naallugu inoqarfiit akornanni isumannaannerusumik assartuisoqartarnissaa aamma aalisarnerup ingerlallualernerunissaa qulakkiissavaat.

Ineriartortitsinissamik pilersaaruteqarnikkut sakkussaqartitsisoqalerpoq, suliniutit Tunumi aalisarnerulertoqarnissaanut tapertaasussat aallartinneqarnissaannut periarfissiisunik. Naalakkersuisut ineriartorneq Tunumi takuneqarsinnaalereersaq pitsaasutut isigivaat, ineriartortitsinerullu aalisartunik, tunitsivinnik kommunimillu oqaloqateqarluni ingerlanneqarnissaa pingaaruteqartutut isumaqarfigalugu. Taamaammat ineriartortitsilluni suliaqarneq Tunumi aalisarnermik ineriartortitsinermut aqutsisoqatigiinnit sulii ingerlanneqartariaqarpoq.

Oqallilluarisi.